



Kattusseqatigiit Partiiat

Tlf. 299 34 61 11 / 34 62 52 - fax 299 32 62 35
Postboks 74, 3952 Ilulissat - tlf./ fax 299 94 47 53

Anthon Frederiksen

Ulloq 3. maj 2007

Inatsisartut suleriaasianni § 36 imm. 1 naapertorlugu apeqquteqaat imaattoq Naalakkersuisunut ingerlateqqippara:
(inatsisartunut ilaasorta q Anthon Frederiksen, Kattusseqatigiit partiiat)

Naalakkersuisunut apeqqut:

- Meeqqanut angajoqqaarsiaasartut pillugit naalakkersuisut qanoq pilersaaruteqarpat ?
- Angajoqqaarsiaasartut qaqugu pikkorissartinneqarnissartik ilimangisinnaavaat ?
- Angajoqqaarsiaasartut aningaasatigut pissarsiarisartangaat qanoq naatsorsorneqartarpat ?
- Angajoqqaarsiaasartut aningaasatigut pissarsiarisartangaasa qaffanneqarnissaat naalakkersuisut qanoq isumaqarfingaat ? qaqugu qaffanneqassappat ?

Tunngavilersuut:

Naluneqanngitsutut angajoqqaarsiaasartut sapaatip akunnerani qaangiuttumi Nuummi akkerliussut-simik takutitsipput. Tassanilu ilaatigut inatsisartut ataatsimiittarfiata silataani oqalugiaqattaarnermi naammangittaalliuuterpassuit eqqartorneqarput aamma allagartarsuartigut saqqummiunneqarput ilaatigut imannak allassimasut:

”meerarsiaavut ulloq unnuarlu 4 kr 58 øre paaqqutarivagut” – ”angajoqqaasiaasugut pikkorissarneqarusuppugut” – ”oqaatsisi piviusunngortissinaangikkussigit meeqqat qineqqusaarutigiginagit” – ”atornerlunneqakatappugut” – ”Naalakkersuisut meeqqat illersortussaavaat” – ”meeqqat tamarmik ajunngitsumik pineqartussaapput” – ”meeqqat atornerlunneqassanngillat illersugassanuku” – ”meerarsiaavut asavagut” – tunniutiinnarusunngilagut”.

Tamakkuupput ilaatigut allagartarsuarni allaqqasut. Aamma paasinarluarpoq angajoqqaarsiaasartut ilaatigut saqqummiusinerminni aamma oqaatigingaat, allaat aningaasatigut pisartakkat ukiuni kingullerni qaffanneqarsimanngitsulluunniit. Kiisalu aamma pikkorissarneqarnissaminnik naalakkersuisuniit siusinnerusukkulli neriorsorneqattaaraluarlutik sulit tamanna piviusunngortinneqarsimanngitsoq.

Kattusseqatigiit Partiiani isumaqarpugut pissutsit taamaattut akuersaarneqarsinnaanngitsut, taamaammatt apeqqutit piaartumik akineqarnissaat piumavangut.